

平利縣鄉土志



歷史

變酋長之蠻風破貴族之階級其自郡縣始乎郡縣之制始自秦而歷代因之近世日本變法維新亦卒歸於是途則仍法乎我中國也說者謂封建不復今不如古亦未明世界進化之故矣夫春秋大居正之義採風問俗必先周而列邦我國大一統之規括地齊民仍區地以為志天下雖大郡縣積之十室必有忠信百世可知損益一縣雖小其歷史亦有燦然可觀者矣本境兼翼軫而分野連蜀楚以為疆眾山若抱一水如環據江漢上游居關輔要隘建置之沿革可得而詳焉志歷史

本境

本境置於唐武德元年今舊縣是也攷唐書地理志武德元年



以故吉安置平利縣大歷六年省入西城長慶初復置縣又寰
宇記云武德元年於上廉城置平利縣八年移於古聲口成南
即今舊縣地此平利之名所自始

未置本境以前

本境在唐以前據路史唐虞之時屬金提國考通志在夏屬梁
州在商周屬荊州商周之時國皆曰庸尚書庸蜀羌髳是也孔
疏謂庸地在漢南襄宇記云金周為周庸國括地志以上庸為
湖北竹房邑及金州皆庸地陝西資政商周為庸國號三庸皆

錄

確證戰國歸楚春秋文公十六年楚人秦人巴人滅庸秦惠王
時置西城縣本境附之猶今之縣屬興安府見興安州志漢因
秦制亦為西城縣屬益州漢中郡又本境在漢為長利縣地見
於方輿紀要後漢並長利入錫縣遂為錫縣地東漢建安二十
年分錫縣屬上庸魏太和二年并縣立錫郡景初元年復省郡
為縣晉義熙初取上廉水以為名置上廉縣劉宋改吉陽縣齊
梁北魏因之西魏改吉安縣北周移吉安於西城以魏興郡為
吉安郡隸金州至隋為金川縣地俱見於方輿紀要及通志此

未置本境之沿革也

既置本境以後

唐以故吉安置平利縣五代皆仍唐舊周顯德一年地為蜀據
宋初仍為平利屬京西南路昭化軍金州安康郡熙寧六年省
為鎮入西城元祐時復置縣隸雲安郡後仍屬金州元廢縣改
為巡檢司隸興元路明洪武三年復置縣屬四川大寧五年屬
漢中府嘉靖二十九年復隸金州萬曆十一年改隸興安州正
德中增設巡檢駐鎮坪鎮坪在本境東南隅即今縣丞分防地
也前清因明舊制仍名平利縣屬興安州乾隆四十七年升興
安州為府本境永為屬縣以上皆就舊縣地而言也嘉慶七年
經畧大臣額勒登保以舊縣城褊窄低窪無險可憑惟白土關
當川楚之衝且地勢高爽奏請移治即今縣是也其時知縣任
奎光依關堡舊基加築成城又經知縣諸能定重修於道光三
年至今尚屬完固

政績錄

州縣為親民之官利害與民共之夫天下利之興也自民始害之除也自民始民之興利除害也自州縣地方官之政績始政之大綱不外立法司法行法三者而已立法雖善司法雖明而行法苟不得人往往大利於民者轉而大害於民至於聽訟則尤民利害之所終而官利害之所始民之產業即官之名譽也查本境山高澗窄荒已加闢堰難再開樹牧而外利罕可興民貧志隘衣皆大布食多粗糧溫飽自安害又何除惟鬪訟之風為南山冠民豈樂為是破家而不顧耶推原其故治地多而治人少蓋法所不及而理無可伸有非見官不為功者訟而破家不訟而亦破家則不如訟矣訟而破家為日暫不訟而破家為日常訟而破家猶為健者而訟而破家反為懦夫則更不如訟矣故興利除害外而聽訟居大端統是三者志政績

興利

知縣黃寬乾隆十七年任創立書院捐置膏火課試生童創修邑志文獻賴以不墜

知縣秦重仁乾隆三十七年任潔已愛民振興文教捐建錦屏書院延名師添課試榛莽之俗漸啟文明是本境開風氣之先者知縣任奎光當嘉慶七年初遷縣治事事創始經營盡善

知縣石珩嘉慶九年任時縣治草創祀典壇廟次第修舉

知縣司徒修在任最久道光六年下車即勸民興水利廣積儲梓蠶桑須知樹桑百益等書散之間民又嘗訓勉諸生以敦品為先刊有禮記左傳公穀爾雅性理諸書名曰易讀以便初學其他若綱鑑擇語等著尤為士林所稱

知縣衛錫恩同治五年任聽訟明敏勤政愛民和易之中寓以嚴肅人咸愛而敬之其創立卷局嚴定章程文風賴以興起士林至今稱頌

訓導史兆熊道光二十八年任司鐸二十年思以治己者治人著有心勸集兒童必讀棘闈奪命錄身世準繩等書行世又重修文廟竭數年之勞瘁規模極為整肅一時遊其門者不特高掇巍科先後相繼涵濡陶養亦步亦趨均成循謹之士風俗亦為丕變

訓導張近功光緒八年任秉性剛直見義必為學極淵博工詩
古文詞著有五經雜記爾雅隨筆異字商榷困學記聞隨筆尤
循循善誘門下多知名士

除害

知縣秦重仁性剛勇乾隆四十五年川匪入境公力守危城率
鄉勇出勦數月盡殲之四境安堵

知縣方其正咸豐六年署任時值歲歉勸民均借立法美備富
民樂其公允而貧民多所全活冬間藍匪由鄖竹窺平利公於
關垭設兵防堵斬獲甚衆境賴以安

知縣梁際殷同治元年署任川匪粵逆兩次攻城公督衆固守
深掘壕塹卒保危城迄今得持為險

知縣楊孝寬光緒十年任聽斷敏決有片言折獄之稱嫉惡為
讎而又喜人改過寬嚴相濟境內肅然至繼成卷局續修邑志
補築城垣尤昭昭在人耳目

典史謝敬莊咸豐四年任幾二十年有政聲同治元年川粵匪
逆兩次來犯公協邑令梁公守城梁公馭衆以寬而公濟以嚴

故民慕而畏樂於効命卒得轉危為安

聽訟

知縣胡廷瑞道光十三年任時值大饑設法籌賑全活甚眾其聽斷於神有令人莫測者

知縣葉兆珪光緒元年署任慈祥愷悌不願以極刑傷人遺體遇事務以勸導為先一片婆心格及頑梗然亦曾拘斃向不能治之老婦陳姓者人嘆為欣快事不料出於低眉菩薩之手知縣劉青藜光緒六年署任廉潔慈惠涵養深沉每理一訟曲盡民情多所平反未嘗拗執以任己性以故牽誣者幸免株連狡詐者莫逃桎梏人心悅服四境獲安

知縣李世鏌光緒八年任下車伊始力除內外相沿習聽斷明決兩造無怨言甫三月卒於署至今猶口碑在道

知縣李炳麟光緒二十九年署遇事明決舉重若輕未嘗矜奇立異是時也天主堂已設立城內初有民教之爭公持之以平理法必求其是嘗曰民吾民也教民亦吾民也吾官可屈吾民不可屈也署任未滿士民深去後之恩

兵事錄

本境向無叛黨他境之叛黨來犯者如南宋建炎四年賊桑仲
犯金州白土關為知州王彥所擊賸明崇禎七年流賊張獻忠
等自蜀還楚盧象升大破於平利之馬林關又陳奇瑜圍李自
成於平利之車箱峽嘉慶元年教匪徐天德等由四川太平分
犯入陝至安康平利二年十月賊姚之富等復出平利明亮德
楞泰等斬賊數千餘皆分竄官軍追至平利緞子坪賊仍合三
年五月明亮與額勒登保勦楚賊於平利之鎮坪賊奔四川按
鎮坪即縣屬縣丞之分防地也四年四月陝賊張天倫由平利
窺竹谿高均德等由太平紫陽出平利犯楚境為官兵戰敗仍
入陝五年八月徐萬富苟文明二賊為明亮孫清元等會兵夾
擊敗於平利之汝河十二月高天升樊人傑二賊復奔至平利
六年正月賊高天升入陝徐天德留楚將與陝賊合官軍扼吉
陽關斷其交結又楊遇春等邀擊賊冉天士於平利二月苟文
明等東至白土關南趨鎮坪為德楞泰追躡之五月敗冉天士
於平利之大渝河又龍紹周苟文明二賊竄於平利辛聰冉天

勝諸賊亦向白土關六月參贊議會勦於平利八月德楞泰賽
冲河等追斬賊龍紹周於平利之盤龍山額勒登保遣穆克登
布敗賊後隊於平利七年三月樊人傑等趨陝為穆克登布擊
敗於平利八年四月德楞泰奏以豐溪平利餘賊責楊遇春搜
勦九年正月餘賊竄平利老林為諸軍會攻奔平利之化龍山
八月賊黨趙洪周斬賊苟文明以降於是平利全境肅清迨咸
豐六年冬藍賊由鄖竹窺平利知縣方其正於關垵設兵防堵
斬獲甚衆同治元年七月川匪郭逆由四川城口竄縣境邑紳
庶吉士邢景周適奉旨幫辦團練遂率鄉勇迎擊賊於邑之泉
河大敗之乘勝追勦是月十六日行抵巴山遇賊數萬衆四面
圍擊團勇潰邢景周死之賊蜂擁至知縣梁際殷督衆固守卒
保危城十月粵逆由湖北竹谿入境趨興安邑西北鄉踞賊營
十餘處縣城戒嚴者數月至二年賊走漢中境始肅清此本境
兵事之大概也

耆舊

自禮載虞庠典隆鄉飲上以序齒而尊賢下以引年而尚德安車蒲輪朝廷優召聘之儀飲蜡吹豳草野呈太和之象轅固申公之聘名賢必徵彼耆英李躬桓榮之尊講學亦資於耆德以先進之規模為後學之講勸事重行修學富著述則庶幾朝有信史野無遺賢也

事業

楊秉恒生七歲而孤依祖亨運祖母氏孔撫育成立未冠入泮家貧業耕供養祖父母歿喪葬盡禮母氏李有病親視湯藥晝夜不寐常籲天願以身代母歿哀毀骨立塋後月朔必詣墓哭泣寒暑無間乾隆三年奉旨旌表孝子順孫後由恩貢任肅州高台縣教諭

余懷堂字路門道光戊戌進士官山西平陸縣知縣為人謹樸學有根柢任平陸有政聲性慷慨好施捐祖五十餘石作平利士子賓興費邑中人材蔚起實賴此義舉以提倡之

武廷輝號蘭蹊道光丁酉拔貢幼穎異十歲六經成誦既長究

心經史砥節礪行其孝出於天性事繼母吳氏無間言有四弟皆繼母出令嚴訓之講解二十餘年不倦諸弟皆成名尤善獎勵後進師事者甚衆咸豐六年土匪作亂公倡辦團練有功會歲饑請邑宰勸捐代賑散谷萬石不假胥吏之手邑民活者以萬計同治元年土匪髮逆先後攻城公協力同守克濟艱危邑人賴之年六十餘卒

武廷珍字鹿萍道光庚戌翰林改吏部主事生平孝友廉介不苟取與通籍後供職銓曹廉明勤慎擢監察御史上疏多見納出守粵東惠州府七月案牘一清劾庸吏四人旋以丁憂去服闋任湖南衡州府正己率屬以學道愛人為己任尋以病乞歸任邱鄉里周給貧乏又置義塚百餘石以贍族人七十六卒

王有信舊縣人性至孝母王氏邁重疾同妻楊氏侍湯藥三月未嘗廢離母歿喪葬盡禮廬墓三年父可海年九旬定省愈加謹及兄弟析居兄病故遺子女俱幼有信視如己子撫之成立代為婚嫁以故孝友無間言其平生輕財重義尤足以返漓俗道光九年旌表孝子

陳克純郡庠生事親以孝聞治家嚴肅恭敬持己正直涉世鄉里有為不善者恐為陳君所知其見敬如此

李恢模號遠峰邑庠生性孝友為人質樸喜推獎善類激濁揚清有古風精醫術鄉人有疾輒往治之不辭遠沮人有以爭訟來告者必以直道勸之訟端多因而息

周行榜邑水田河人幼有至性父母有寒疾至冬輒發榜每夜必以身暖衾十數年無間父母歿痛不欲生寡言笑如癡蓋出於至性也

楊應春邑石牛河人事母孝母歿哀毀了立築室墓側獨居三年每月朔焚香哭泣聲動行路

學問

李鳳集嘉慶二十五年恩貢事親孝講學以修身為先不專以科名相勗好義輕財有古人風著有文稿二卷待梓

丁光斗字濟陽道光十年歲貢性奇慧幼即志在聖賢之學入泮後屢應鄉試不第遂潛心著述數十年無少間授徒務實學遇人輒勸以明明德與孟子性善之旨畧同著有明德普同河

洛衍義周易淺見川上指掌尼山再表四書旁通錄聖畧新標
醒世淺語諸書待梓年八十六卒

武廷鑿事業見前其學問根柢經史手抄成帙於小學近思錄
尤身體力行著有印都自勉記待梓

武廷珍事業見前生平喜讀書經史子集皆丹鉛評點嘗校刊
小學近思錄講學務求適用著有養靜山房全集江東野亭錄

汪波字海門同治七年歲貢事繼母以孝聞兄弟友愛無間
敦品勵學教授五十餘年皆循循善誘名士多出其門

王正方字端甫同治癸酉選拔光緒乙亥舉人歷官武功三原
長安教諭幼聰穎好學潛心經史著有讀史脩忘錄嘗謂人必
以著述待晚年則終身無著述矣有錯誤處自己批改即長進
也

胡鈞字鼎臣光緒丙子亞元生平孝友端方弟兄析居以沃
廬讓幼弟主講五峯書院數年人文有起色邑人士咸奉為規
臬焉年五十卒著有養拙山房文集待梓

張承燮字雲青咸豐戊午年舉人同治二年辦理陝南軍務以

功保直隸州署甘肅肅州知州後改官山東歷任濱州益都膠州現任臨清州知州居官三十餘載而家無添產其廉潔已可想見性嗜學收藏多經世有用之書公餘嘗以讀書自娛行年七十無少懈著有孔孟志略儒先述等書已梓

李聯芳字賢齋同治辛未翰林歷簡廣西山西雲南甘肅福建順天考官幼家貧嘗得業師之力及通顯事之如父祿俸所入必分給弟兄曰兄弟同枝烏可不同沾 雨露即家庭之內油然可欽嘗編修邑志著有詩文集待梓官至內閣學士

附功臣

李逢亨乾隆丁酉拔貢由州判分發河工歷遷黃河道陞至河督數年黃流順軌河不決溢 帝有福星之獎後署直隸總督

附名將

田大武邑分防鎮坪人道光七年隨威勇公長齡征張格爾張逆遁入喀爾鉄蓋山武偕段永福胡超等窮追至山巔生擒之賞給確勇巴圖魯即用守備繪像紫光閣陞白土營遊擊遷新江紹鎮副將

皮昌魁咸豐七年以調勦安徽軍務出力保千總同治二年攻

克渭南等處回巢以守備補用三年克復平涼首先登牌保花翎都司又以攻克清水縣回巢保遊擊四年克復固原州賞二品頂戴五年攻克紅河川老巢保參將加銳勇巴圖魯名號六年鮮岐山圍七年攻克三不通回匪老巢保副將八年截巢永樂堡白吉原大股竄回陣斬偽帥于彥祿以總兵升用九年為陝安兵備道呼敦右營馬隊幫辦總兵

陳得勝同治初由軍功累功至遊擊尋克復鞏昌府奮勇先登生擒首逆以副將用賞花翎給利勇巴圖魯克復渭源縣狄道州城以總兵記名簡放嗣因天水北路肅清以提督記名簡放換博多歡巴圖魯名號又以勅塔爾巴哈台陝回加頭品頂戴光緒十年欽差幫辦新疆軍務大臣伊犁將軍總理行營軍火局事務

葉占魁由行伍累功至花翎都司尋以鮮鞏昌圍克熟陽城董家堡各處回巢保遊擊又以收復洮州以參將補用加副將銜七年克狄道州城以總兵請旨簡放并給資勇巴圖魯加提督銜統帶開字中營又統帶永定軍

附忠節

羅世濟字虛舟明萬曆己酉科解元官澠池縣教諭素負大義
剛正不阿闖賊來犯誓以死守澠池城陷力戰被執不屈死子
得鴻在籍續兵守城城破被執亦以罵賊遇害妻子俱殉

邢景周字楷夫咸豐丙辰翰林授庶吉士咸豐六年請假回籍
是年冬芝匪竄擾縣東公倡募團勇以防禦功加贊善銜九年
告養在籍十年六月奉 旨幫辦本地團練同治元年川匪竄

境親率鄉勇至邑之泉河防禦適賊大至麾眾攻擊大敗之斬
獲無算賊遁公乘勝追勦行次巴山賊眾數萬志銳來犯或勸
以勿進不可督勇力戰賊四面圍擊團勇皆潰公猶手刃數賊
力竭被執百計誘降公厲聲憤罵曰有死而已賊怒甚寸磔之
奏聞奉 旨從優議卹 贈知府銜並 命原籍建立專祠襲
世職雲騎尉

陳 鈺由行伍保千總同治元年歸籍與邢公景周同辦團練
是年七月偕邢公率鄉勇勦賊於邑之巴山賊眾來犯鈺奮力
攻擊斬賊數人旋以眾寡不敵被執不屈死之奏請予雲騎尉